

四庫全書

集部

欽定四庫全書

宋文鑑卷六十七

宋 呂祖謙 編

表

謝南郊加恩表

王 珪

奉二精之報方錯事於崇立獵三靈之流遂均釐於通
輔仰承嘉命俯惕孤衷伏念臣蚤會昌期進聞國論器
雖狹於所用志常勇於有為屬修郊廟之祠叨與公卿

之議鳴鍾在簾獲際靈游之娛紆佩掃塗親承天步之
恪曾之秉文之助得觀繼聖之能逮敷錫於鴻休復過
膺於寵數論非朝允思實天隆茲蓋伏遇皇帝陛下文
輯濶希仁漸䟽逃因神推惠既被蟲魚之豐為已掠功
何勝淵谷之畏尚勉殫於樸守期少謝於曲成

請皇帝罷謁太廟表

王珪

近嘗拜章以大慶殿將行恭謝天地之禮乞罷前一日
謁太廟者伏以升燎于壇即節徂郊之禮奉璋于室宜

財假廟之文俞音未回羣聽猶鬱恭惟尊號皇帝陛下
膺純耀之烈撫休明之期蓋神勞萬務則氣或盪和以
德交三靈則福亦旋感念保綏於鴻業思昭謝于高穹
迺涓路寢之居以象園丘之饗粢盛芳潔璧玉華光方
將陟配三后之靈導迎上帝之貺茲誠為人子者孝之
盡有天下者報之隆今復馳齊蹕之嚴祇太室之薦竊
恐霧露之氣涉于宵衣輿馬之音震虩天步則非所以
承祖宗之受來邦家之休臣等冒秉化鈞獲司熙典謂

文之所損在于適時之變且事不敢勉誠以愛君之深
冀不並侑之虔願弭先期之謁儻乎衆欲是契天心

謝賜生日禮物生餼表

王珪

詔函俯暨臺饋申頌絕衡粥之異恩動里閭之殊觀伏
念臣所懷褻淺自奮羈單方少而孤每感劬勞之日其
生也幸得遭熙盛之朝遂以區區投老之身而處赫赫
具瞻之地與圖邦政固無經遠之謀式燕私門更誤養
賢之禮此蓋伏遇皇帝陛下寵綏近辟丕冒庶工謂君

臣同體則憂樂宜均而上下相求則報施為重幣繒寶
筐寵已厚於解衣餼稟盈庭愧有加於浮食敢不內竭
朴愚之守上酬獎顧之深

謝賜生日禮物表

王珪

聖言如綉有溫厚於芝函邦錫自天發光華於蔀室榮
踰素望媿溢常涯伏念臣以固陋之資被睿神之眷迺
預塵於政路復冠列於台司歲月崢嶸而屢更精力勤
勞而莫補速譏讒於衆口愧功烈於前人逮茲苟完安

有橫冀載及桑蓬之序方深岵岵之思念莫報於劬勞
敢饗承於思禮良金燭乘嚴寶勒於天駒藻帛絢文雜
華章於笥服豈繫蕃庶併及衰遲此蓋伏遇皇帝陛下
敷舜孝以儀民軫堯仁而冒物特厚柄臣之遇過盼御
府之珍交孚曲記於賤生博愛乃容於濫賜拜漢庭之
寵雖慙稽古之工報周雅之章願上如岡之壽

越州謝上表

沈文通

以親為請得郡甚優越去宮庭介居江海就職之始撫

心弗寧伏念臣本諸生知守前緒親逢文治之盛冒塵
科選之榮擢躋儒林遂執史筆學不足以達治亂於顧
問實難文不能以通古今於述作何有誤出聖朝之遇
進登侍從之塗黽勉備官逡巡待罪雖大恩未報豈敢
便安其身顧私養弗充不勝進退之迫輒以誠乞既茲
奠居幸溢於涯感無以喻此蓋伏過尊號皇帝陛下天
地之德覆載而無所不容日月之明照臨而無所不暨
故臣得遂其犬馬之志安于藩翰之間况茲為州自昔

建國連帶數郡之廣總齊萬兵之權有可以為當無所
苟尚寬東顧之慮少獲萬分之心

越州謝上表

元絳

易帥嶠南方深危懼分符浙右特荷保全仰服恩章惟
知感涕伏念臣習知忠誼竊慕功名歷事三朝行將四
紀向自北垂之漕就更南粵之麾蒙臨遣以丁寧敢違
安而留滯載驅長陸甫及半途忽聞羽檄之音謂有龍
編之警橫水明光之甲得自虛聲雲中赤白之囊倡為

危事邊萌擾動朝聽震驚況在乎守臣敢愆奔命夙馳
南海已久見於吏民日遠長安蓋未聞於章奏仰煩宵
旰咨及臣鄰謂護塞之急人且擇才而代戍驅車萬里
虛出玉關之門乘駟一麾幸至會稽之邸尚兼方面彌
畏人言此蓋伏遇陛下法道曲全等天丕冒以臣更事
綿久備歷四方之勤知臣立朝最孤迥無一介之助渙
然休命付畀价藩臣敢不訓旅以嚴安民以靜庶希樂
易之治仰補熙隆之時銜賜不貲論生曷補

謝致仕表

元絳

四載披誠，斬還於朝。組九重垂聽，申錫於詔。玉預儲宮之備，官遂家林之佚。老伏念臣，衣纓衰緒，檣櫟下材。再亂而孤，僅能構思。未冠而仕，始務代耕。惜儒術之遙原，徇吏文之宿業。歷官三世，服勞四方。蒙上聖之誤，知自東州。而即召擢，寘詞禁進。處冬官浸膺，選衆之求。竊貳贊元之任，近藩出守。過潛邸之建苑，別殿追還。復露門之奉席，遽周歲律。屢對威顏，自惟癯朽之餘。每循止足。

之戒深辭圭紱冀就田廬載齒孤鳴空懷疲戀槁骸如
在正欲全歸仰煩睿訓之慈終竊愚衷之守不圖寵眷
加進榮階存東宮保養之官仍西清嚴近之職效華封
之祝子佇見多男階商皓之通賓願護太子恩隆山岳
感浹肺肝此蓋伏遇皇帝陛下大道曲全至仁博施念
師丹之垂老久已宣勤察衛綰之無他居常遠恥越推
渥渙獲保初終訖里俗而有輝顧師言而至愧冥鴻雖
遠正依天寓之函容時藿未彫尚素日華之明潤逢辰

知幸之死不忘

定州謝上表

呂公著

尸榮右府無俾廟筭之竒假守中山復當閹制之重戴
恩為懼虔命以行適屆郡封恪宣條詔伏念臣降才謏
薄植性懦愚學術不足以稽五謀之疑識慮不足以籌
千里之勝特以百年舊族荷累聖不貲之恩一介微軀
辱上主非常之遇蚤緣寵渥更踐清華晚收疎外之孤
蹤擢贊微幾之要務奉天光而咫尺被聖誨之丁寧謂

臣世服近僚有均休共戚之義察臣傍無厚援絕背公
植黨之嫌曲示優容俾思報效顧鴛鉛之難強嗟蒲柳
之易衰久預枋司積有妨賢之畏游祈麾寄更圖陳力
之方伏遇皇帝陛下體虛靜以儲神極高明而盡下俯
矜素悃特霽俞音惟定武之與區據朔陞之重地尚叨
付委靡即棄捐仍進叙於文階且兼華於秘殿併將厚
意增賁舊臣况臣夙侍軒墀實司樞筦凡治軍經武之
要洎守塞禦戎之宜日炙睿謀備觀宸斷逮茲臨遣得

以遵承謹當細大必躬夙宵彌勵進不敢希功而生事
退不敢弛備以曠官期不玷於誤知庶少酬於鴻施

河陽謝上表

馮京

久塵右地無補聖明坐竊彌藩尚寬罪戾恩私溢望愧
灼兼懷伏念臣才不逮中智非經遠持逢盛際再列近
司擢之於尋常之中振之於顛危之下便蕃異數究極
寵光齟齬備員僅能寡過碌碌成事無足論功徒肩許
國之誠靡講衛生之術曩嬰疾疹殆至膏肓雖賴上醫

迄存餘喘然而氣血潛耗智慮早衰筋力乏於步趨耳目乖於聽覽勉從職事仍歷歲時覆餗之譏已騰衆口乞麾之請遽側上心矧惟右輔名都三城重鎮水陸皆便次舍非遙食物具宜堂皇尤峻使傳罕經於館候訟牒希至於庭除加以時雨既優宿麥滋茂盜賊屏息閭里阜安不煩施為有便願養此蓋伏遇皇帝陛下天地容覆日月照臨私臣以不報之恩諒臣有可矜之理終始眷遇進退保全顧何心顏敢愛軀命惟願稍加藥餌

益近方書朝露未晞儻復還於舊觀爝火不息誓更竭
於精神

賀熙寧十年南郊禮畢大赦表

曾鞏

人之所歸者莫如德天之所享者在於誠其惟聖王克
有全美伏惟皇帝陛下聰明稽古承繼祖宗慈惠愛人
撫臨邦國有徧覆并容之大度有防微慎獨之小心不
從遊畋不近聲色無紛華盛麗之好無便僻側媚之私
歲時吉蠲以承七廟左右順適以奉兩宮其功施於人

效見於事則宅仁由義縉紳之徒成材於學校超距躅
鞠熊羆之旅養勇於營屯甌窶汚邪之收充於倉廩闢
石和鈞之利阜於市廛家有豫樂之聲人無愁怨之色
協氣所召休應自殊鈎陳太微星緯咸若崑崙渤澥濤
波不驚近則金石之音鳥獸欣躍遠則干羽之舞蠻夷
駿奔象齒旅於闕庭龍媒納於閑廐是謂六府三事皆
可以歌四海九州罔不率俾蓋巍巍而特起非瑣瑣之
能闕前世議太山之封謀梁甫之禪者度崇比大疇克

登茲陛下抑而不圖謙以自牧以謂先后創業垂統其
功莫得而名上帝墮祉發祥其德無可以稱思所以報
一本於心故寅畏嚴恭積之有素而齊明薰祓進而益
虔在於物者不取其煩盡諸已者必求其實是以蕭光
之烈奏於宗祊柴燎之蒸焜於郊兆幽隱昭答神靈顧
懷無疆惟休方寔昌於萬世不敢專享故敷錫於羣元
稽參典彝定著赦令弛張從理同異稱情蠲罪青而棄
瑕疵錄勞能而縱逋負顯晦咸暨洪纖不遺萬國之歡

既交於沖漠一人之慶遂及於跂蠕孚于上下之間極
乎帝王之盛臣被學最舊蒙恩寢深莫侍甘泉之祠獨
嘆周南之滯第從臣之嘉頌未效薄材望屬車之清塵
但馳遠思

謝元豐元年歷日表

曾鞏

一遠闕庭十移星歷顧彫零於齒髮無補報於毫分伏
惟皇帝陛下叙大禹之九疇濟有虞之七政陰陽寒暑
罔不若時草木昆蟲舉皆遂性循用頌正之典寵詔分

土之官臣幸備守藩預聞告朔去親方遠已驚歲月之
新許國雖堅更嘆功名之晚惟體在民之意庶禘及物
之仁

謝翰林侍讀學士表

范鎮

省中四禁忌誤其一苟或有犯加罪不原猥蒙貸全猶
藉親近內自循省以榮為憂竊以賞而受賞者若固有
之善賞也罰而被罰者知自取之善罰也成王舉魯七
百里之地以封周公周公拜於前魯公拜於後而不以

為泰者功所當也管仲奪伯氏駢邑三百沒齒無怨言者罪所宜也伏惟皇帝陛下錄社稷之功而賞加輔臣重書詔之失而罰及學士賞所當賞罰所當罰明命一出中外聳然因使天下之人曉然知先帝與子之明而羣臣得君之慶臣於此時死固無憾况蒙再造使之更生者乎重念臣出乎遠方孤陋朴拙臣子忠義則嘗講聞朝廷典章實非練習果緣所短有玷斯猷不加蕭斧之誅仍換金華之職雖云薄責足警羣倫且天地大恩

固無論報之理而冰霜素節猶有持守之常願堅初心
以收來效

謝致仕表

范鎮

早衰多病得謝歸休有命自天所容如地仰銜恩紀伏
竊兢榮伏念臣本出孤生歷塵臚任曾無報効虛積歲
時仕宦之年已更一世遭逢之幸實事三朝徒有愚忠
以自信處雖曰乞身而去敢忘憂國之心因叙人言上
干天聽曲蒙寬貸未賜誅夷得於盛明之時以遂閒適

之性伏惟皇帝陛下審持賞罰而一諉於公總秉權綱而不放於下集羣議為耳目以除壅蔽之姦任老成為腹心以養和平之福躋民富壽措國康寧臣之至情實在於此

謝龍圖閣直學士表

宋敏求

推宸扆之誤恩備禁塗之常從聞命榮抃省躬兢惶伏念臣性理蠢冥局致庸近猥緣承學之舊寢沐右文之風英宗皇帝拔自書林寘於詞掖雖汲黯蚤進謬旅於

雋游而蕭育稀遷自安於拙分一叨獎拔星紀僅周固
嘗勵翼其心靖其所守顧命義以弗苟務忱恂而匪他
以至陟諫臣之坡司史氏之筆還儒館而塵麗正之職
分使節而贊甘泉之儀益忻聖旦之親逢莫匪臺家之
茂選而曲綏皇眷冒進榮階謂臣嘗事先朝典右曹之
緡縉俾臣特陞延閣直西序之圖書撫棄迹以重收帖
寵名而差叙帶環申錫詔掄垂褒此蓋伏遇皇帝陛下
權綱大新恩斷中出均天地之平施煦及陳芟回日月

之餘光豐於蔀室致茲竅器亦預清班敢不慎服官箴
勤殫忠蘊庶圖來效少報洪私

安州謝上表

滕甫

屢致人言固宜竄殛曲蒙天造尚賜保全雖易守符仍
叨善地土民純秀幾同廣魯之流風里俗驩康正值元
豐之樂歲安閒事簡尸素為慙伏念臣本以愚儒出逢
真聖首蒙國士之遇最在衆人之先便欲碎首以酬恩
未知死所故嘗指心而自誓惟有天知况事任既已徧

更在人情寧不愛惜豈有固為緩縱自取顛隳惟日月之至明亮肺肝而必照矜憐舊物收置近藩而朝廷難廢於公言故君父特存於大體稍從遠外終不棄捐顧臣何入受恩若此此蓋伏遇皇帝陛下神聖徧物清明在躬化覃無外之封疆仁及何知之草木况臣累更器使粗効愚衷眷此遺簪嘗辱提携之未譬之行葦更收踐履之餘臣敢不祇奉簡書服勤吏役雖桑榆之景將逼暮年而犬馬之微誠猶思後效

謝澶州盜判表

程顥

論議無補職業不修國有典刑罪在誅戮曲蒙宏貸仰
荷洪私期於糜捐莫可報謝臣性質朴魯學術空虛志
意粗修智識無取陛下講圖大政博謀羣材過聽侍臣
之言猥加風憲之任臣既遭遇明聖亦思誓竭疲駑惟
知直道以事君豈忍曲學而阿世屢進闊疎之論愧非
擊搏之才徒嘗剋滙肺肝曾無裨補毫髮既不能繩愆
糾繆固不願沽直買名豈敢冒寵以居惟是奉身而退

自劾之章繼上闔門之請深堅天意未回憲章尚屈更奉發中之詔俾分提憲之權不惟沮諍論之風亦懼廢賞刑之實力形奏述恭俟誅夷此蓋伏遇皇帝陛下極天清明普日臨照洞正邪之心迹辨真偽於幽微察臣忠誠恕臣狂直不忍寘諸重辟投之遠荒解其察視之官處以便安之地生成之賜義固等於乾坤涵容之恩重益逾於山嶽臣敢不日新素學力蹈所知秉心不回信道愈篤願徇小夫之志不為儒者之羞或能自進於

尋常庶可仰酬於萬一

代謝進和御詩獎諭表

強至

參羣篇而奏御賡載非工被優詔之發中褒嘉甚渥惕
然拜君父之賜藏以為子孫之榮伏以書曰帝庸作歌
所以極道明良之意雅云臣能歸美所以上酬福祿之
辭惟千載一時之逢踰三王二帝之際乘太平之多暇
講稀闊之盛游歷寶宇以披祖宗相受之文御飛帚以
縱神聖有餘之學以至置酒別殿賦詩中宸于時從聯

咸續睿唱如臣者有朴愚而植性無文采以表身自陪
風憲之要司都廢惟言之舊學妄挾鄙思綴成斐章大
樂在前發哇聲而接響太陽臨下街燭火以交光既黷
邃旒若臨深谷敢謂兼容之度例形過獎之辭游聖門
者謂之難言矧繼堯文之後踰華袞者重夫褒字矧蒙
漢訓之加夫何孤臣竊此厚幸此蓋伏遇尊號皇帝陛
下齊德乾覆育材士倫善雖小而弗遺力或矜其不逮
誓竭講劄之效庶酬假勗之仁

代都運趙待制謝上表

強至

小材而臨大計不知經畫之所從薄量以函厚恩唯有
思勤而可補竊以今之北道重曰外臺邊宿勁兵境控
疆敵歲支洪河之備而民力幾屈所以艱於賦輸地列
數鎮之師而吏員益繁所以要在刺舉宜擇精明疆濟
之器以付轉給澄清之權若臣空孱於事迂拙鄙引兩
川之漕近貳大農之司率痛竭於愚衷訖罕通於利術
敢期煩使乃委孤臣此蓋伏遇皇帝陛下廓天地之容

收涓埃之細特加不次之命而欲勸來者弗責已試之效而俾懷後圖得不夙夜以思始終乃職豈敢顛聚斂之最以上累於君仁亦當拊凋殘之餘庶下蘇於民瘼

代謝再任表

強至

悃悞繫陳從欲許還於新節衰疲自力竭能勉撫於舊封委寄逾隆顛躋自懼伏念臣本緣一介之曲學力被三朝之誤知自解宰鈞繼紆守紱早年遇事風霜不計於殘軀晚歲纏痲藥餌乃同於常膳比引揣躬之分数

裁辭劇之章力丐開州少安病質而思生望外事與願
違俄更西雍之師旋仍付北門之留鑰所以極陳去就
仰黷聰明幸寵利非事君之宜必冀寢加恩之命策疲
駑雖老臣可彊敢不拜再任之休訖奉俞音兩諧愚懇
此蓋伏遇皇帝陛下至仁天冒盛德海函器使庶工愛
徧舊物雖俊傑甚衆並試有為之時而疋痒之餘惜投
無用之地敢不勤宣條教兼附兵民儻溝壑之未填尚
乾坤之可報

宋文鑑卷六十七

欽定四庫全書

宋文鑑卷六十八

宋 呂祖謙 編

表

淮南轉運使謝上表

蘇頌

贊畫甘泉久玷三臺之末觀風淮甸驟陞數使之榮朝
寄匪輕地望兼重愧非才選靡稱厥官姑謹詔期趣行
所部寵靈所被畏惕非常竊以州郡備官所以分釐於

民務朝廷遣使所以布宣其主思付一道之事權用六條而舉察賦輿出內俾以均輸吏治否臧責之薦黜自匪綿更於事任詎能肅振於治綱若臣者才不足以適時慮不足以經遠偶緣資級之例得從選用之階始自書坊出分使竹俄從褻服入佐計籌粗收歲月之勞蔑著分毫之效豈謂伏遇皇帝陛下察庶工之任使矜久職之良勤拔於省察授以利柄矧惟清海之部實搯東南之衝昔號輿區今逢樂歲五稼盈疇而遂茂四民勤

力以厚生料乎漕運之程無煩趣辦之急惟當敷宣惠澤通究物情編齊之利病可更立求其本刑政之重輕或失當適其中止期靖嘉少稱論擇若乃事體貌以為風采盡銖兩以歛民財顧在懦愚誠多濶略重念上慈天覆聖治日新官無內外之殊事悉憂勤之繫昨臣受任之始獲面於清光陛下臨遣之言曲加於勉諭自省最為於疎遠何圖亦記於淵衷豈非以委任之優故特示拊循之厚雖乾坤平施非報謝之可言而犬馬微生

第勤勞而思奮倘驅馳之有用期終始以無踰

右僕射待罪表

蘇頌

聖恩深厚仰戴曷勝孤迹競危彷徨靡所竊以宰輔大
任表率百官人望所歸則論議行而必信物情不與則
名器輕而易搖而臣猥以樸愚誤蒙任使上不能謨明
國體以熙庶工下不能甄別人材以協衆望誤國有譴
擢髮寧窮致招人言上黷天聽名一誥於白簡罪當寘
於丹書雖二聖覆之於天未令投迹於四裔而羣言謂

其失職豈宜包羞於近班是以屢貢封章冒塵旒旒再
行中札曲諭宸衷捧詔驚惶重自修省本欲便祈於歸
老屬茲方負於罪辜倘布懇誠懼為僭越在臣進退之
分敢計重輕於國廢置之間實關勸沮伏望太皇太后
陛下皇帝陛下矜憐其戇本無他腸案舉嚴科亟行幽
黜一則安全於介拙尚保餘生一則厭息於煩言遂清
朝路

衡州鹽倉謝上表

劉摯

議令獻言知典刑之無赦原心觀過荷仁聖之有容貸
其餘生處以善地伏念臣稟生艱拙遭世盛明學不能
窮達而知幾材不足趣時而適變晞名塗以旅進濫文
館之末游和鉛何功索米逾歲間承人乏偶攝篆於中
堂旋誤聖知使備員於憲府仍職書林之舊就行御史
之中始自愚臣前無故事方陛下繼承於五聖而國朝
平治者百年力勤肯獲之田大解不調之瑟蒐拔羣材
而審以器使變化百度而曠然日新臣於此時職在言

路誓殫忠義敢避勢權寧以孤睽許切拂衆而危身不
忍從容唱和負恩而速進狂愚自信裨益無方故宿官
之日幾何而瞽言之罪非一至於均民而弛役因之率
戶而出泉雖慮始樂成者愚人之不知然損下益上者
先王之大戒輒條十害冀補萬分議臣見譏以為敗謀
而亂化清衷獨見知其有責以盡言不徇以誅止容其
去褫臺閣之二職置瀟湘之一涯有祿食使之存全有
職事可以報効銜恩載幸揣分增憂此蓋伏遇皇帝陛

下察臣孤忠全國大體不惜散一夫之法庶幾留衆正之門謹當上體恩仁期於必報下堅節義死而不踰

謝青州到任表

劉摯

東方大國莫如鄆青愚臣何人繼命帥守蒞官茲始揣己不遑伏念臣器韞至疏智靈弗競遭會繼明之始越膺共政之圖三府空逮於六期千慮蔑聞於一得雖進退必繇其道常願學乎聖人而功烈如此其卑終難收於士論寬典刑於司敗假丘壠之便藩報政稽期實愧

三年之魯改符易地猶叨四履之齊惟時東秦號一都會士知禮義境控海山厥民富饒少攷攘之舊習其俗舒緩有平易之餘風謹於承流可以無事曾是迂愚之品獲塵寄委之優此蓋伏遇皇帝陛下乾健而粹純豐中而光大沉幾以通變化定鑑以御妍媸人無遐遺材以器使臣敢不振勵衰境激昂至恩簡禮去煩稍究前修之治推仁宣澤庶求遠俗之安倘集涓微仰酬覆幬

知亳州謝上表

劉攽

齒衰髮暮藩鎮會繁據非所安榮以為懼昔者聖門高
第方六七十則所願為漢世諸儒至二千石謂之達官
蓋量力審己雖小邦實曰才難逢辰慕君在有道不容
徼幸此所以前哲言志區區其若彼後賢受祿振振焉
在茲况如愚臣本緣末學粵塵仕路不棄昌時暨忝分
符遂更三郡曹為近輔非復自檢之譏魯并泰山仍有
變齊之舊至於渦譙名壤淮楚近郊猶龍之所誕生真
聖是焉臨幸大朝景毫蕪武湯之上儀迎年執期格帝

鴻之純貺民俗既富官守維嚴豈伊戇愚猥叨寄任邈
逾匪分高視曩先密焉自思仍有餘寵獸擊換舊僅踰
期月之淹隼旆越疆纔倍宿春之費此蓋伏遇皇帝陛
下聖仁妙算睿知極深廓久照於容光溥太和於播殖
流形品物默化陶鈞致是小材預膺榮遇謹當布宣詔
旨盡瘁官箴為身愚謀雖冀不殆於知止報國本願尚
謝餘生於自然誓殞百身勿渝一志

知襄州謝上表

劉攽

脫身謫籍縲組近藩仰荷恩華不任感懼臣早者溫承
人乏出假使車材非所長力不自料黽勉歲月孤負選
掄正所謂斗筭之材何暇論繩墨之外然惟利術至廣
巧者有餘果聞係踵之後人略取析毫之上第涇以涓
濁故常畏於後生李代桃僵竊自悲於薄命遽辱黜幽
之典實由既往之愆浮舟江湖託身瘴癘無復自新之
望長懷永棄之憂不謂明詔發中湛恩逮下俾復乘軒
之寵仍加分虎之榮情同更生感惟出涕此蓋伏遇皇

帝陛下離明廣照乾度并容紹庭之初方勤心於陟降
思皇之際亦代匱於細微以是孱愚得從甄敘謹當勉
求民瘼恪佩官箴犬馬之心以勞力故能有養桑榆之
景雖已老尚冀無渝

徐州謝上表

蘇軾

分符高密已竊名邦改召東徐復塵督府荷恩深厚撫
已兢慙伏念臣奮身農畝託迹書林信道直前曾無坎
穿之避立朝寡助誰為先後之容向者屢獻瞽言仰塵

聖鑒豈有意於為異蓋篤信其所聞顧慙迂闊之言雖多而無益惟有樸忠之素既久而彌堅遠不忘君未忍改其常度言之無罪實深恃於至仁知臣者謂臣愛君不知臣者謂臣多事空懷此意誰復見明伏惟皇帝陛下日月照臨乾坤覆幬察孤危之易毀諒拙直之無它安全陋軀畀付善地民淳訟簡殊無施設之方食足身閒仰愧生成之賜顧力報之無所懷孤忠而自憐

徐州賀河平表

蘇軾

聖謨獨運天眷莫違庶邦子來民罔告病萬杵雷動後
不逾時遂消東北莫大之憂然後麥禾可得而食人無
後患喜若再生伏以大河為災歷世所病禹治兗州之
野十有三載乃同漢築宣房之宮二十餘年而定未有
收狂瀾於既潰復故道於將湮俛仰而成神速若此恭
惟皇帝陛下至仁博施神智無方達四聰以來衆言廣
大孝以安宗廟水當潤下河不溢流屬歲乂之無虞故
患生於所忽方其決也本吏失於防而非天意及其復

也蓋天助有德而非人功振古所無溥天同慶維豐沛
之大澤實汴泗之所鍾伊昔橫流凜孤城之若塊迨茲
平定蔚秋稼以如雲害既廣則利多憂獨深而喜倍雖
官守有限不獲趨外庭以稱觴而民意所同亦能抒下
情而作頌

謝失覺察妖賊赦罪表

蘇軾

盜發所臨守臣固當重責罪疑則赦聖主所以廣恩自
驚廢逐之餘猶在愍憐之數伏念臣早蒙殊遇擢領大

邦上不能以道化民達忠孝於所部下不能以刑齊物
消姦宄於未萌致使妄庸罔圖僭逆原其不職夫豈勝
誅况茲溝瀆之中重遇雷霆之譴無官可削撫已知危
至於捕斬羣盜之功乃是鄰近一夫之力謹言於始偶
出於臣雖為國督奸常懷此志而因人成事豈足言勞
勉自列於涓埃庶少寬於斧鉞豈謂蕩然之澤許以勿
推收驚魄於散亡假餘生之晷刻退思所自為幸何多
此蓋伏遇皇帝陛下舞虞舜之干示人不殺祝成湯之

網與物求生其間用刑本不得已稍有可赦無不從寬
務在考實而原情何嘗記過而忘善益悟向時之所坐
皆是微臣之自貽感愧終身論報無地布衣蔬食或未
死於饑寒石心木腸誓不忘於忠義

謝宣召入院狀

蘇軾

詔語春溫再命而僂使華天降一節以趨在故事以常
聞豈平生之敢望省循非稱愧汗交深竊以視草之官
自唐為盛雖職親事秘號為北門學士之榮而祿薄地

寒至有京兆掾曹之請豈如聖代一振儒風非徒好爵
之糜並享大烹之養玉堂賜篆仰淳化之彌文寶帶垂
金佩元豐之新渥既厚其禮愈難其人而臣以空疎冗
散之材衰病流離之後生還萬里坐閱三遷不緣左右
之容躡處賢豪之上此蓋伏遇皇帝陛下生資文武天
祚聖神雖亮陰不言尚隱高宗之德而訪落求助已啟
成王之心首擇輔臣次求法從知人材之難得采虛名
而用臣敢不益勵初心力圖後效才不逮古雖慙內相

之名志常在民庶免私人之誚

謝侍讀表

蘇軾

北門視草已叨儒者之極榮西學上賢復玷侍臣之高
逸省循非稱愧汗交懷竊惟講讀之臣止以言語為職
考功課吏無殿最之可書陳善閉邪有膏澤之潛潤豈
臣愚陋亦所克堪此蓋伏遇太皇太后陛下憂思深長
德業久大受先帝投艱之託為神聖經遠之謀故選左
右前後之人罔非吉士使知興亡治亂之效莫若多聞

謂臣雖無大過人之材知臣粗有不欺君之實故使朝夕與之討論奉永日之清閒未知所報畢微生於盡瘁終致此心

杭州謝放罪表

蘇軾

臣近以法外刺配本州百姓顏章顏益二人上章待罪奉聖旨特放罪者職在承宣當遵三尺之約束事關利害輒從一切之便宜曲荷天慈不從吏議伏念臣早緣剛拙屢致憂虞用之朝廷則逆耳之奏形於言施之郡

縣則疾惡之心見於政雖知難每以為戒而臨事不能
自回苟非日月之明肝膽必照則臣豈惟獲罪於今日
久已見傾於衆言恭惟皇帝陛下睿哲生知清明旁達
委任臣下逾託於不能愛養人材惟恐其有過知臣欲
去一方之積弊湏除二猾以示民特屈憲章以全器使
臣敢不省循過咎祇服簡書眷此善良自不犯於漢法
時有貸捨用益廣夫堯仁

又謝太皇太后表

蘇軾

亂羣之誅不請而決蓋恩威之無素致奸猾之敢行方
俟譴訶豈期寬宥伏以法吏網密蓋出於近年守臣權
輕無甚於今日觀祖宗信任之意以州郡責成於人豈
有不擇師帥之良但知繩墨之馭若平居僅能守法則
緩急何以使民顧臣不才難以議此恭惟太皇太后陛
下寬仁從衆信順得天推一身之至公納萬方於無罪
而臣始終被遇中外蒙恩謂事有專而合宜情無他而
可恕故加貸捨以示寵綏朝廷之明粗以臣為可信吏

民自服當不令而率從

賀駕幸太學表

蘇軾

輦回原廟既崇廣孝之風幄次儒宮復示右文之化禮
行一日風動四方臣聞五學之臨三代所共蓋天子不
敢自聖而盛德必有達尊在漢永平始舉是禮雖臨雍
拜老有先王之規而正坐自講非人主之事豈惟允誓
退託不能奠爵伏興意默通於先聖橫經問難言各盡
於諸儒恭惟皇帝陛下文武憲邦聰明齊聖大度同符

於藝祖至仁追配於昭陵故舉舊章以興盛節臣早塵
法從久侍經幃永矣馳誠想聞合語於東序斐然作頌
行觀獻馘於西戎

謝賜厯日表

蘇軾

歲頒正朔蓋春秋統始之經郡賜璽書亦漢家寬大之
詔實為令典豈是空文伏以望歲者生民之至情畏天
者人君之大戒所以常言報應而不言時數每奏水旱
而不奏嘉祥上有銷復之心下有變調之道固資共理

同底純熙恭惟皇帝陛下祇敬三靈憂勤萬事為仁百
世自然天下之歸教民七年豈無善人之效臣敢不仰
遵堯典寅奉夏時謹隄防溝洫之條行勞來安定之政
庶殫綿力稍助至仁

賀立皇后表

蘇軾

續女惟莘倪天之妹事闕廟社喜溢人神臣聞三代之
興皆有內助二南之化實本人倫維闕睢正始之風具
既醉太平之福民有所恃邦其永昌恭惟皇帝陛下自

誠而明惟睿作聖輯寧夷夏德既茂於治朝輔順陰陽
政兼修於內職既膺大慶益廣至仁下逮海隅夫婦無
有愁嘆上符天造日月為之光明受祿無疆與民同樂

謝禮部尚書表

蘇軾

備員西學已愧空疎易職東班尤驚忝冒遂領宗卿之
任并為儒者之榮始臣之學也以適用為本而恥空言
故其任也以及民為心而慙尸祿乃者屢請治郡兼乞
守邊欲及殘年少施實效而有志莫遂愧負何言今乃

以文字為官常語言為職業下無所見其能否上無所考其幽明循省初心有腆面目故於拜恩之日少陳有益之言孔子曰一言而可以興邦而孟子亦曰一正君而國定昔漢文悅張釋之長者之言則以德化民輔成刑措之風而孝景入晁錯數術之語則以智馭物馴致七國之禍乃知為國安危之本只在聽言得失之間恭惟陛下即位以來學如不及聞道八年寒暑不解講讀之官談王而不及霸言義而不及利八年之間指陳至

理何啻千萬雖所論不同然其要不出六事一曰慈二
曰儉三曰勤四曰慎五曰誠六曰明慈者謂好生惡殺
不憲兵刑儉者謂約己省費不傷民財勤者謂躬親庶
政不近女色慎者謂畏天法祖不輕人言誠者謂推心
待下不用智數明者謂專信君子不雜小人此六者皆
先王之陳迹老生之常談言無新奇人所易忽譬之飲
膳則為穀米羊豕雖非異味而有益於人譬之藥石則
為耆朮參苓雖無近效而有益於病若陛下信受此言

如御飲膳如服藥石則天人自應福祿難量而臣等所學先王之道亦不為無補於世若陛下聽而不受受而不信信而不行如聞春禽之聲秋蟲之鳴過耳而已則臣等雖有三尺之喙日誦五車之書反不如醫卜執技之流簿書奔走之吏其為尸素死有餘誅伏願陛下覽臣言稍留聖意天下幸甚

謝賜對衣金帶馬表

蘇軾

服章在笥賁及衰殘銜勒過庭喜先徒御伏以物生有

待天施無窮草木何知冒慶雲之渥采魚鰕至陋借滄
海為榮光雖若可觀終非其有妻孥相顧驚屢致於
匪頌道路竊窺或反增於指目此蓋伏遇太皇太后陛
下聰明齊聖陳錫哉周含垢匿瑕而察於求賢卑宮菲
食而侈於養士士豈輕於千里念非其人言有重於兼
金當思所報

謝復官提舉玉局觀表

蘇軾

七年遠謫不意自全萬里生還適有天幸驟從縲紲復

齒縉紳伏念臣才不逮人性多忤物剛褊自用可謂小
忠猖狂妄行乃蹈大難皆臣自取不敢怨尤會真人之
勃興與萬物而更始而臣獨在幽遠最為冥頑迨茲起
廢之初倍費生成之力終蒙記錄不遂棄捐此蓋伏遇
皇帝陛下正位龍飛對時虎變神武不殺孰非受命之
符清淨無為坐獲銷兵之福聰明不作邪正自分使臣
得同草木之微共霑雷雨之澤臣敢不益堅素守深念
往愆沒齒何求不厭飯蔬之陋蓋棺未已猶懷結草之

忠

建寧軍節度使謝表

呂惠卿

備嚴近之選而抵非常之愆當清明之朝而罹甚重之譴孽乃自作咎將誰歸伏念臣起自諸生暗於大道持款啟之聞而欲經於事變信呻吟之得而希掛於功名分既過逾理宜顛越矧先帝有為之始乃羣材願効之時輒先要津以闕賢路雖預討論者三四事而叅機務者一二年凡是蠹國害民之由實臣懵學誤朝之致豈

亦下流之所處更令衆惡以皆歸偶失當時士師之刑
難逃今日司直之論尚蒙善貸未寘嚴誅特從四裔之
遷以正三兇之比衰疲遠謫人皆知其難堪親愛生離
聞者為之太息伏惟皇帝陛下天仁自得聖孝光充撫
弓劍之遺藏每加悽愴顧廟堂之舊物寧不盡傷特罪
悔之至深猶典刑之為屈龍鱗鳳翼已絕望於攀援蟲
臂鼠肝一冥心於造化涕逐言出莫知所從

賀元日大朝會表

呂惠卿

寶鼎更端明廷四覲上儀畢舉綿寓均歡恭惟皇帝陛下道大同於堯天日躋格乎湯聖深仁溥博達孝光通神祇感於治馨祥嘏由乎和致維歲月日時之首乃朝宗覲遇之先循用舊章通陳盛禮東臺瑞物冠玉璽之珍符左戶輿圖增金城之列障樂象成而乃作文稱賀以非虛多士盈庭四夷在列忻逢千載之運敬上萬年之觴臣俯迫頽齡久縻外間不及趨慶闕庭徒切瞻依


旒冕

謝翰林侍讀學士表

范祖禹

辭其可辭敢忘故事受其可受祇服新恩恭惟真宗初
置講職問學常勤於日昃論經或至於夜分以啟迪於
後人俾監觀於成憲先帝更新治職正命兼官雖因革
之制不同而經緯之文則一惟熙寧元豐之成烈有金
匱石室之舊聞丕顯帝謨尚資史筆追觀列聖之典多
委四輔之臣夫何一介之微膺此一命之重此蓋伏遇
皇帝陛下欽明文思齊聖廣淵如日方中法天不息謂

二帝三王之道當窮極於高深一祖四宗之書已光昭
於永久惟念終於典學聿追孝於前文以臣夙侍書筵
叨塵史館曲加寵數用示眷留昔魯穆公之於子思亟
饋鼎肉燕昭王之於郭隗改築金臺二子者或以無人
乎側而不能安或欲致士於遠而先為始如臣陋學敢
望古人非懷人爵之可榮竊喜聖心之不倦



宋文鑑卷六十八

欽定四庫全書

集部

宋文鑑卷

六十九至
七十一

詳校官監察御史臣周元良

助教臣常循覆勘

總校官降調編修臣倉聖脉

校對官中書臣李荃

謄錄監生臣楊遐齡

欽定四庫全書

宋文鑑卷六十九

宋 呂祖謙 編

表

開封府羣見致辭

林 希

臣希等以聖人在上首善始於京師天下修文貢士興於猷畝此蓋伏遇尊號皇帝陛下仰稽古道下育人材發明詔於多方命興賢於列郡臣等繆當詔旨輒與能

書雖為草野之臣得奉天庭之貢

尚書禮部元會奏天下祥瑞表

林希

臣珪等言尚書禮部得元豐五年天下所上祥瑞宣徽南院使判北京臣拱辰承議郎提舉河北常平等事宜之通議大夫知秦州臣公孺龍圖閣待制知青州臣綰正義大夫知安州臣甫朝議大夫知興元府臣景華朝奉大夫知滎州臣震西上閣門使知雄州臣舜卿禮賓使知安肅軍臣孝綽文思使知憲州臣詵朝散郎知鼎

州臣伋知歙州臣堯封朝奉郎知蜀州臣少連承議郎
知安德軍臣從諒知利州臣山等言所部有芝生於州
宅寺觀殿閣柱有七莖者一苗長尺餘者六牛生二犢
者二嘉禾合穗者三五本合為一者一麥一莖三穗者
四穗者五穗者百餘穗者各一白烏白鵲生於巢者各
一臣聞聖人出而四海清帝命昭而萬靈集必致諸福
之物以表太平之符伏惟皇帝陛下體堯之仁躬舜之
孝力行勤儉而本以化物誠意惻怛而出於愛民是以

指麾之間功業成就覆載之內陰陽協和蒙被羣生決
肌膚而淪骨髓涵濡異類霑動植而洽飛翔仰而觀者
景星慶雲俯而視者醴泉甘露扶疎煒燧發為朱草三
秀之英游泳伏馴則有白麟一角之異嘉葩連理之木
異畝同穎之禾巢鵲可附而窺池龍可豢而擾謂宜作
為聲詩而奏於郊廟深銘太史而著之簡編以永無疆
之休以昭特起之蹟考諸已往可謂絕世之殊祥抑而
弗宣猶以為盛德之餘事自時所紀殆不絕書茲者駕

鸞輅以充明廷撞黃鐘而御太極典禮大備官儀一新
殊方駿奔重譯輻輳自昔辮髮卉裳羈縻之所未至踰
沙軼漢言語之所未通咸奉玉帛而介九賓龍衣冠而
獻萬壽烜赫盛德冠古超今巍巍煌煌傳示何極鋪張
王會之衆美哀對皇家之盛容臣等恭率有司伏尋故
事稽叅圖牒宜先象齒之珍敷道句臚敢上龍墀之奏
歡呼忭蹈倍萬常情

尚書省謝車駕臨幸表

林希

天臺肇建具崇喉舌之司帝車下臨羣幸陞簾之寄非常之舉視古無倫恭惟皇帝陛下天縱多能日新盛德剷除衆弊裁制萬微考先王之董治官立尚書以政為本紀綱條理見微旨於新書初作規模別牧司於著位蓋慮之積年而成於茲日聞諸前世而驗於方今忽紆清蹕之傳采聳鴻都之觀且北辰居極外環象斗之宮而黃道所經旁及積星之位瞻威顏於咫尺被法語之丁寧敕以在公退而交警分曹帥屬燦然周典之文望

輦拜恩陋彼漢郎之嘆矧復宗藩旅進禁從相趨凡獲
侍於宸遊皆預窺於聖作懽聲載溢慶榮遇於一時信
史備書流美談於萬世臣等叨膺重任久負明恩顧懷
備位之慙第劇逢辰之幸敢望策勵期稱寵臨

亳州謝賜卹刑詔書表

林希

奉聖詔之丁寧見上心之欽卹恭惟皇帝陛下治道清
淨本堯舜之性仁訓辭哀矜同禹湯之罪己雖推行故
事實憂閔黎元臣所領州地號重法南為故楚北則全

齊推理為奸其來尚矣殺越於貨間或有之嚴設檢防
深用懲艾臣初至問俗比年稍登咸知愛身頗重犯法
夫庶恥以衣食為本豐凶者獄市之原民之常情勢自
當爾臣謹遵奉成憲申戒有司囹圄之間敢遂期於無
犯縲繫之下庶罔底於非辜祇循寬條用塞吏責

謝天章閣待制表

林希

忽繇疎遠俾冒恩榮進不得辭退何勝懼臣竊惟朝廷
明位本以待殊尤特起之才臺閣縉紳宜序進於侍從

論思之列分義既定品流自安敢意超踰倏及孤外伏
念臣少而嗜學仕則為擊柝抱關初安一命磨鉛削槩
忝事三朝金馬石渠出入殆逾於二紀皇墳帝典討論
常預於片言一去軒墀五更符印方兩宮之旰食閔赤
子之阻饑申飭守臣悉發常平之廩蠲裁歲計就輟上
供之儲全活者一方更生者萬口父老至於感涕童稚
莫不歡呼脫於溝壑之虞皆自乾坤之施顧臣無職在
法何逃核實之誅屏息心力伏遇皇帝陛下智周萬物

明燭四方通達下情靡遠邇戚疎之有間主張善類故
包涵庇覆以無遺既保宥以曲全復矜憐其次缺拜恩
舊服玷籍近班譽生不虞寵出非望夙無循吏之政誤
被璽書之褒徒有稽古之愚曷稱服章之錫况臣心甘寂
莫年迫衰遲分以滯蒙老於冗散今茲收擢彌甚驚憂
惟是偏州適承明詔漕由京口控全吳飛輓之衝埭復
占城救積歲旱乾之患方且身先畚築手諭準規計蚤
暮以收功成江淮之長利倘容戮力豈憚糜軀天日九

重但心存於北闕圖書三閣許夢到於西清

謝賜資治通鑑表

林希

臨政善治乃明主之用心受詔修書固儒臣之能事成
而進御寵以匪頒何彼下臣遽沾殊賜恭惟英宗皇帝
生知典學性好觀書豈止求之多聞實欲輔之自得然
萬幾藜委載籍紛繁自學者不得遍窺况人主何暇周
覽思有所述頗難其人疇若人哉莫如光者給尚方之
筆札萃三館之圖書許自辭官用資檢討量加常俸不

責課程上下馳騁於數千載之間出入將隨於十九年之內其間明君良臣箴規議論切磨之精語名將循吏方略條教魁梧之偉功休咎庶政之原天人相與之際抉摘奸宄褒崇善良網羅羣言囊括舊史如海之藏珍怪魚龍之無數如山之包草木鳥獸之難名披分畝澮之末流蔽映彫蟲之小技旅游東國常屢歎於斯文留滯終南遂克終於先業雖古者興亡事迹固已燦然而光之筋力精神於此盡矣尚苦言官之督責熟諳俚俗

之謗嗤卒成一代之書仰副兩朝之志揭為通鑑時則
勿迷資彼治原捨茲安出神宗皇帝飲講筵而進讀揮
宸翰以賜名製序而冠其篇端鏤板而布之天下仰君
臣之際會已極丹青何父子之淪亡忽悲風露豈謂門
墻之舊物退收鉛槧之微功開卷涕流拜嘉汗浹此益
伏遇皇帝陛下聰明迪祖宵旰思皇留神於乙夜之勤
訪問於西清之輿伏遇太皇太后陛下數寧大業持載
烝民安所寶之儉慈格無疆之壽考遠追三鑑坐振四

維顧一介之靡遺與羣賢而樂共儲無儋石曾非菽水之憂家有賜書留作子孫之寶

謝諫議大夫表

張舜民

方安謫籍忽對鋒車入瞻八彩之秀毫進與七人之上列竊聞明主臨政而願治先王為官而擇人號曰梓材取其器使若夫諫諍之任政惟侍從之臣地密而選清秩卑而望重其所以起居言動則與史官相表裏其所以彈訶風察則與臺憲同戚休始則專弼人主之違今

乃汎論天下之事乃者藥石不進鳧鴈僅存伏馬一鳴
茅茹不已豈謂大明之東出廓然積雪之自消鼓之以
惠風潤之以膏澤南窮海嶠北浹江湘脫禁錮者何翅
二千人計水陸則不止一萬里死者傷嗟之不及生者
匍匐以來歸昔居輔弼之崇謀謨帝所終作蠻夷之鬼
棄擲道旁古先未之或問畢竟不知其罪敢望桑榆之
晚景獲依日月之末光招魂於楚水之涯拭目於雲臺
之表手遮西日口誦離騷齒髮摧頽漫索太倉之粟衣

裳顛倒驚聞長樂之鐘此蓋伏遇皇帝陛下上當天心
下厭人望見幾不俟終日從諫甚於轉圜變通得之神
宗寬大類乎仁祖豈止芻蕘之被賞將令泉壤以銜恩
率是以行為國何有敢不激昂暮氣緝理空文乘白馬
而伏青蒲試圖來效餓西山而蹈東海期免後艱

謝賜卹刑詔表

李清臣

徒孥頌繫交手傳歡吐隸聞音相趨動色風雷鼓舞律
呂和平屬在守臣惟知處分竊惟厯代之為政莫若本

朝之卹刑承平幾百四十年覆養方二三萬里德如天
地日月恩及草木蟲魚尚慮府縣狴牢官曹卒吏誦司
空城旦為業習柱後惠文之風喜作煩苛私行慘刻或
致孤窮無告疾痛不聊是頒詔教之丁寧申諭州邦之
長守使之網羅寬大櫺檻疏通日與涼飈時視藥物比
周王之扇暘殆又過之雖夏后之泣辜亦止如是此蓋
恭遇太皇太后陛下睿慈兼裕仁治醇醲尊居九重之
深周念四海之遠謂聖世不專以刑為天下王者常欲

以恩結民心仰寧八室之光靈垂慶億年之統祚臣敢
不奉行上意祇率外臣

免加右光祿大夫表

李清臣

宗廟穆清方祔神靈之享王庭昭曠重推雨露之恩優
渥薦臻震皇無措敢殫血懇仰冒聖聰竊以義者天下
之大經分乃人臣之常守稱多量少豈宜有失於一毫
論重評輕必使外厭於羣議如龠合之器是何足以容
輔車如欒櫨之材彼安能以勝梁棟苟犯滿溢之戒將貽

顛覆之憂伏念臣技能素卑學問殊淺無益當時之實
用宜為盛世之畸人歷任累朝誤躋四輔日索太倉之
米月受水衡之錢職空任於股肱勤不施於竹帛同省
僚列豈無邪掄而詆訶舊山隱淪能不指背而譏笑夙
宵腆赧形影徬徨未退即於幽閒已深慙於尸素更增
顯寵將累至公恭遇皇帝陛下天縱睿明日新制作欲
贊斯時之美方收多士之英致此誤恩猥加朽質任人
惟舊固惟聖主之隆私受爵斯忘深懼先民之至誠冀

還異數庶息煩言

謝除中書舍人表

蘇轍

越從左史擢領西垣口出命書身叅法從竊念山林之迹本無富貴之心聞命若驚固辭不獲伏念臣生本西蜀家世寒儒學以父兄為師貧無公卿之助私有求於祿養輒自力於文詞慨然東遊無以上達際會仁祖訪求直言策語猖狂恃聖人之不諱考官怪怒惡悻直之非宜孰知悟俗之言特被愛君之詔感激恩遇遂忘死

生莫酬國士之知適有私門之禍未填溝壑重迫飢寒
時於道塗望見神考一封朝奏夕聞召對之音衆口交
攻終致南遷之患生雖不遇常辱顧於二宗時不見容
勢殆濱於九死厄窮自致黽勉何言敢云衰病之餘復
被寵光之幸此蓋伏遇太皇太后陛下母慈均覆坤德
無私欲以任姒之明躬行堯舜之上肆求多士以道成
王者老畢會於朝廷耕築不遺於林莽遂令拔擢猥及
空疎馮唐已衰猶願雲中之往貢禹雖老未忘封事之

勤譬如木之在山生則荷恩而死無所怨水之於地行則潤下而止不敢辭臣之事君義亦如此欲報之意非言所殫

謝除尚書右丞表

蘇轍

渙汗之患已行而不及偃偻之志雖勤而莫伸上愧鴻私下慙公議恭惟皇帝陛下接堯舜之統蹈成康之仁禮貌先正耆老之臣揀拔後來翹秀之士俯仰六載前後九人坦然公明故不私賢否之實穆然淵默故坐照

情偽之真臨御久則鑒愈明得失分則下無隱如臣者
西南賤士章句小儒早歲猖狂偶竊方聞之遠中年流
落既安縣尹之卑遭時乏人致位近侍跌宕文墨之圃
囁嚅議論之場學皆空言安有實效顧惟省轄之重實
叅國論之餘豈無遺賢遽及微品地寒資淺何以望三
事之餘光才短力薄安能裁六聯之滯論雖復僂俛就
職愧欲何言此蓋伏遇皇帝陛下天地之仁曲成草木
之陋父母之愛不錄子弟之非將建大厦以覆羣工故

聚衆材而收棄物然臣負過其力受非所容惟有潔已
無私或不孤於託付引類自助幸得免於顛隳不渝始
終少答恩遇

賀明堂表

蘇轍

饗帝尊親古今之大典推恩肆青天地之至仁舉此盛
儀併在今日伏惟皇帝陛下以仁御世以誠事天乾清
坤寧兵戢民阜人悅故神罔不宥物備故禮得以成一
享園丘三謁路寢誠敬之心與日兼茂寬大之澤靡物

不蒙能事既修全福自至方將享堯舜之上壽膺成康
之令名民願所同天心是若臣頃侍幃幄稍厯歲時譴
責之深坐甘沒齒江湖之遠猶冀首丘久蟄泥塗聞震
雷而惕若深囚籠檻得清風而自疑

降朝請大夫謝表

蘇轍

罪大恩寬言者未厭官高德薄法所不容尚領真祠實
出寬憲伏念臣早塵近列無補明時下則拙於身謀上
則闇於國體先朝矜其愚陋宥以遐荒前後七年浮沉

萬死偶真人之御歷數大號以惟新普復舊官亟叨厚
祿然臣年迫衰暮知復何為身利退藏顧未敢請因循
於此黽勉自慙雖復追削者五官仍且獲安於閒局涵
恩至厚為幸已多此蓋伏遇皇帝陛下以堯舜之仁行
成康之政表未忘於舊物恩許畢其餘生臣謹當杜門
躬耕沒齒蔬食知死生之難報姑靜默以待終

代賀景靈宮奉安御容禮畢表 呂希純

即上都之福地載廣珍庭會列聖之睟容益嚴昭薦良

辰叶吉緝禮告成凡預照臨率同慶忭竊以仙源濬發
帝業肇基祖功休盛於湯文宗軌繼隆於啟誦雖寢廟
時饗裸將克備於靈承而衣冠月游館御未經於制度
恭惟真主允集大成皇帝陛下至孝格天文明若古眷
神功潛躍之宇有章聖誕彌之祥夙建清都仰延真馭
迺規恢於舊址庸考卜於新宮凜然太紫之威隱若神
明之與惇宗有昭穆之叙謁款無來往之煩而復秘殿
重深列坤儀之正位回廓曼衍圖拱極之近寮逮不日

以休工肆前期而歲事璿題洒落煥東壁之星躔藻衛
森羅備甘泉之法駕奉雕輿而降格拔玉座以妥安詔
蹕亟臨羣司畢至瞻舜瞳而增慕施禹拜以忘勤精意
克伸繁禧舉集洽需雲而示惠霑解雨以疏恩嘉與羣
倫同茲大慶臣蚤塵樞幄方守塞垣阻陪鵷鷺之班徒
深燕雀之賀

宋文鑑卷六十九

欽定四庫全書

宋文鑑卷七十

宋 呂祖謙 編

表

代文潞公謝太皇太后表

張 來

稽留君命敢求免於刑誅惠養老臣不使勞其筋力仰
睿思之從欲撫衰志以知榮伏惟太皇太后陛下厚德
無疆聖仁在上神孫臨祭知保依之聖功多士充庭見

肅雖之盛德恩及草木喜同天人臣幸以餘齡獲逢盛
旦雖邊豆駿奔之事徒有心哉而禮樂大備之時為後
死者豈不偶爾尚是矜榮

免右僕射表

韓忠彥

申寵命以自天榮非意及措微躬而無地愧與憂并仰
冒眷衷歷陳危懇竊以君臣同體取象於元首股肱上
下交孚相親如腹心手足所以代天工而理物故能熙
帝載以奮庸自昔御臨尤為艱慎惟德業之蕪茂乃邦

家之有光伏念臣學無他長止堪近用不為詭隨以循
衆但知直道以事君遭遇聖時未隳素業贊陪機政惟
任孤忠墻高每懼於疾顛綆短固難於深汲更冒非常
之寵深虞可畏之言矧今蠹萌未消國是難一事有可
否必分年號而得行臣無忠邪槩指朋類而皆廢西方
師老而財匱斗米至於千錢北道河潰而民流十室幾
於九堵大需更新而猶多禁錮宿逋雖減而尚迫追呼
方欣大有為之時乃用不世出之士豈茲綿薄能副詳

延伏遇皇帝陛下奮獨斷之用廣弼諧之謨旁求不問
於庶位專任况多於舊人采擢微才收還成命譽歸明
主名器不輕於假人謗息愚臣負乘免聞於致寇

謝史成進朝奉郎表

曾肇

裁成二帝之書仰資聖訓褒錄諸儒之效俯逮孤生繆
進官榮并叨恩賚省循非稱冒昧為慚竊以簡冊之傳
固多帝王之書為重文章之用非一述作之體為難在
昔有邦若時稽古自周而上具載百篇之言繇漢以還

各成一代之史典謨之辭略而該春秋之法謹而嚴子
長既繆於是非見稱事核孟堅頗推於詳瞻或患文繁
降及後人益艱是任或紀事支離而失實或設辭翫敝
而不工或疎略牴牾之相形或取舍抑揚之未當厯觀
前載茲謂才難矧兩朝功德之崇高而五世聲名之富
有以至俊傑瑰竒之士禱机魏瑣之奸載在史書傳之
後裔宜得貫穿馳騁之學溫厚深潤之辭追二典之光
華垂百王之模範如臣之鄙揣分無堪幼聞道於父兄

粗知好古長論文於師友竊慕著書然而植性昏冥受
材濩落有淺見寡聞之累無屬辭比事之長遭世盛明
脫身冗散天祿石渠之興蚤預校讐金匱玉版之文得
參論次茲儒林之盛選實仕路之殊榮特達甄收莫非
帝力周旋長育咸出聖恩自視空虛固難報稱雖勤劬
於夙夜漫淹厯於歲時闡發大猷豈敢希於作者整齊
故事或可繼於前人甫臨汗簡之終適遘負薪之疾奏
書天陛阻親望於清光拜賜宸庭莫與聞於褒治豈期

推賞并及罔功養拙藏愚久已逃於常憲因人成事茲
復玷於異恩遜辭勿容驚惶莫措此蓋伏遇皇帝陛下
務尊先烈祇紹永圖謂祖考之功非形容之可繼而子
孫之孝在潤色之為能深詔有司共成大典蓋蕪資於
衆論不求備於一人每於載筆之勤靡問吹竽之濫致茲
瑣質均被鴻私螻蟻雖微素積愛君之志涓塵有補敢
忘許國之忠

陳州謝上表

曾肇

初緣細故輒丐徙州繼露危誠復求易地圖報未伸於
萬一冒煩已至於再三自非仁恕之朝當在譴訶之域
聖恩甚厚私願弗違視太守之章孱愚知幸望長安之
日感涕難勝伏念臣託勢至孤叨榮過重謀身寡術易
致於人非竊祿無功難逃於鬼瞰材微命舛福薄災深
方祇厯下之行忽遘漳濱之疾顧筋骸之素憊困藥石
之交攻氣屬如絲識幾去幹已分身歸於厚夜不圖天
假於餘生恍如夢寐之初回憺若醒醴之未解神明凋

耗形體支離念官守之尚遙追玉程之有限內省尪羸
之質豈堪撼頓之勞非敢自愛於疲癯實懼仰慙於任
使幸修門之在望恃延閣之見收叫閣自言伏質俟罪
蓋疾痛之加者呼父母而是懇精誠之至者動金石而
非難果上惻於淵衷俾曲從於私便維茲藩輔密邇京
師事簡民淳首被朝廷之化里安戶佚稀聞桴鼓之音
顧臣何人獲此善地可覬康寧之福皆緣覆護之恩矧
常守於是邦有相望之仲氏流風未遠故事可詢重念

臣昨守汝陰亦隸畿右始引小嫌而求避出於慮患之
太周終明大體而復還良以至公之在上銘心敢怠粉
骨難酬此蓋伏遇皇帝陛下聰明燭於幾微而降寬盡
下威德加於九有而內恕及人篤遺簪墜履之仁推藏
疾納污之誼太皇太后陛下處奧室之中而周知萬事
據崇高之勢而洞照羣情常懷大德之好生不忍匹夫
之失所憫臣忝陪侍從之末察臣實嬰沈瘵之餘假借
寵靈安安孤朽臣敢不體上之慈而哀矜於下念己之

病而綏養斯民庶收塵露之微少答乾坤之施

賀元祐四年明堂禮成賜赦表 曾肇

侑帝饗親既金聲而玉振赦過宥罪遂雷動以風行歡
聲達於幅員協氣充乎上下竊以躬事天之禮莫如王
者之堂極嚴父之心是謂至人之孝講茲鉅典屬在熙
朝即路寢以親祠兆於仁祖黜五精之並祭斷自神宗
光昭前聞啟迪後嗣恭惟皇帝陛下紹膺寶命祗適先
猷平成百度而不有其功覆載羣生而不尸其德謂時

和歲稔之效乃高穹顧諟而然謂刑清武偃之祥乃七
廟威神之致矧屬承祧之始永懷濡露之恩將伸報本
之誠且展事生之道以祭恐數而瀆故遵三歲之期以
郊則遠而疏故度九筵之位季秋月令吉日上辛備法
駕之儀協雅聲之奏牲牲博碩籩豆靖嘉元龜大輅之
旅陳篆鼓錯衡之輻輳并柯共抵按圖謀而充庭髦首
貫冑衽衣冠而就列以引以翼有壬有林奠珪帛以告
虔舞羽旄而象德靈心合答精意感通喜得四海之懽

增受萬年之策尚念有司之庶獄豈無弗獲之一夫乃御端闈函數大號滌瑕盪穢責已逮鰥空狴犴而縱縲囚開府庫以賜軍士布慶施德昭天漏泉彼泣辜弛網之仁推食解衣之惠方之於此不其狹歟臣忝綴從班適分州寄莫與奉璋之列徒懷拱極之心

南京謝上表

曾肇

得郡便私未報期年之政因人易地更分京邑之權朝始去於故棲夕已臨於新部伏念臣材不堪於巨用行

有愧於古人蚤塵侍從之華寢昌藩垣之寵未踰更歲
更守二州既不能興教化於民使之遷善而遠罪又不
能作聰明於外因以譁世而取名惟殫夙夜之勤期副
焦勞之念矧彼淮揚之地舊為楚國之郊屬頻年昏墊
之餘加比屋凶荒之後浚溝隍以疏積潦發廩庾以賑
流民方竭力以經營遽蒙恩而罷徙國家別建都邑內
壯帝畿維王迹之所基視他邦而尤重掌離宮之筮籥
奉原廟之衣冠以屬微臣彌慙非據此蓋伏遇皇帝陛

下矜憐舊物優假近班尚容環走於王畿因使周知於
土俗奉承清問敢希家室之歸攀仰末光未覺長安之
遠誓當盡瘁少冀分憂至於事鞭撲以立威飾厨傳以
干譽非明時之所尚亦私意之不為

徐州謝上表

曾肇

懷章去國不啻三年荷橐入朝未淹百日復棲遲於民
社驟違遠於闕廷迫義理之當然豈人情之所願竊念
臣稟性固陋承學迂疎懷是古之至愚抱守官之獨見

豈特難堪於世用固已不善於身謀昨者召自留都處
之宗伯屬郊丘之肇祀儀天地之經祠執禮雖明趨時
則戾已行之令豈孤論之能回不韙之誅敢偷安而苟
免旋抗章而請罪蒙易地以示恩繼露微衷復頒溫詔
終賴乾坤之造曲成犬馬之私假以使符置之善地循
行閭里固多魚米之饒周覽山川頗有江湖之趣夫何
孤蹇獲此便安此蓋伏遇皇帝陛下寬裕有容包涵徧
覆將以招致芻蕘之論是用特寬斧鉞之誅伏惟恩慈

豈易報稱臣雖在外義不忘君况仰賴於聖明忍自愆
於表守深念長人之寄知無不為益堅許國之誠死而
後已

南京謝上表

曾肇

以儒懦而辭將符以親嫌而避邊要頗識事君之義敢
干留令之誅仰賴聖明俯矜誠請既逃罪戾仍獲便安
伏念臣無所取材粗知嚮道雖險阻艱難備嘗之矣而
造次顛沛必於是焉以平生寡偶而少徒故臨事易危

而多畏昨期外補聊避煩言未容默突之黔遽改并門
之師且節制方面號為儒者之榮率先從行正是人臣
之分便當即路豈敢懷私但以任非所長力有不逮矧
兄弟之孤立擅將相於一時中懼滿盈外虞讒間再瀝
籲天之懇終蒙易地之優維陳宋之輿區首東南之甸
服周流二國俯仰十期何幸衰年復尋故步望千門之
宮闕識三后之衣冠合抱干雲或異時之拱把我冠束
帶多前日之佩觿所愧薄材曾微惠政下孤民望上負

國恩此蓋伏遇皇帝陛下舜智兼容堯仁徧覆初無心於予奪皆因物之短長是致孤生與叨平施毋輕民事方竭力於茲辰苟利公家誓捐軀於異日

賀冊皇后表

曾肇

中闈肇建盛禮興行人神協謀夷夏胥慶竊以國家為天下之本后妃實王化之基致治所繇求端非遠恭惟皇帝陛下紹天駿命垂世永圖承七廟之吉蠲奉三宮之供養而長秋虛位六職曠官咨求淑人來相宗事上

遵太母之訓下採有司之言鼓鐘在庭典冊備物坤元
博厚已正於隆名婦順章明可風於率土臣雖在外義
不忘君誦造舟之詩想見光輝之盛申彤管之誠庶幾
補報之忠

賀上傳國寶表

曾肇

受命之符為時而出自天之裕維聖是承方拜貺於大
庭遽均恩於率土官師動色海宇蒙休臣聞夫國璽之
有去來猶周鼎之有輕重好治而惡亂舍昏而即明頃

自有唐之衰荐臻五代之季伏而不發殆且百年忽而
自歸將傳萬世所以表祖宗積累之慶告社稷靈長之
休在聖與仁宜昌而壽恭惟皇帝陛下沈潛迪哲剛健
好生參天地以成能垂子孫而作則果有神物自貽皇
家固將配甘露以紀元豈止擬芝房而度曲臣職專守
土志切慕君講稱壽之儀阻陪下列奏升中之頌敬俟
方來

宣州謝上表

曾肇

信而後諫愧無平仲之言罪不容誅誤脫成湯之網屈
嚴科而賦命畀善地以寧親至澤隆寬自古未有愚心
感激欲報何從伏念臣蔽蒙之人迂濶於事以直道為
敬天之實以詭情為駭俗之非殺其身有益於君行之
無悔見其利不顧其義死莫敢為知萬折而必東故三
已而無愠汲黯之戇寧免世嫌子文之忠蓋出天性竊
服兩宮之知遇稍希八彥之激昂故有橫逆之來曾無
左右之助口欲清而愈濁外無正而不行獨傷忠敬之

難明亟比欺誣之重坐既免投於荒裔仍擇處於近藩
風俗休戚在所漸摩朝夕旨甘得其順適道固隆於善
貸恩尤著於曲成此蓋伏遇皇帝陛下聽德惟聰使臣
以禮兼洪覆無私之運均大明徧照之神謂好言利病
者有區區憂國之心謂不事權貴者非汲汲謀身之輩
方免官而從衆竟薄責以勸忠臣敢不敬體惠慈退加
修省凡正心而誠意必明辨而篤行金石可磨底慎子
臧之達節死生不變庶幾徐邈之有常殫夙夜治民之

勞全始終報上之志

鄂州謝上表

張商英

布宣溫詔開諭遠民雖湖山千里之間如醑醕一堂之上聽歡聲之相告慙共理之非良伏以旁接九江前臨七澤地遐而陋俗魯以愚雖有沈寃莫能徃愬至於極病祇自悲吟蒙被皇明申頌德意所謂率科嚴重鈞考碎煩方田擾安業之農園土聚徙鄉之惡省租紐折公帑貪求學校驅迫者或違其孝養之心保伍追呼者或

失於耕桑之候寺觀培繕營之費東南配漕輓之舟抑
認香鹽強招卒伍文移速於星火追捕徧於里閭百端
紛更一切蠲罷可謂崇寧之孝治真為紹述之聖功而
臣初効外官恭承嘉命惟憂疲懦未克推行豈有設施
可圖報稱有君如此碎首以之此蓋伏遇皇帝陛下誠
實應天典常師古王路以平其好惡道樞以會其是非
察臣於元祐之間未嘗干預憐臣於元符之末首被擠
排一洗刑書再還仕籍退循衰晚虛辱寵榮辟穀留侯

歸休有素據鞍馬援進取何堪誓堅忠孝之心永保初
終之節

宋文鑑卷七十